

Evelyn Ruiz-Croes a presenta e version nobo na Minister di Enseñansa

“Epa!...un strea y mas strea” ta cla pa bay den e maletin di tesoro

Den cuadro di e celebracion di 25 año di nos Status Aparte

Na año 1997, Evelyn Ruiz-Croes a tuma e curashi di publica, cu sosten di Charuba, un buki pa mucha chikito pa yuda nan compronde un tiki di historia mas recien di nos isla. Su titulo tabata “Epa! ... un strea”. Ta im-

portante pa nos generacion nobo sa cu nos tabatin relacion hopi estrecho cu Corsou, Boneiro y Isla Ariba.

E mesun buki aki awor a conoce cambio y a adapt’e pa año 2012

den cual a inclui e desaroyonan pa cu Antias den cual e islanan a separa for di otro despues di 10-10-10. Awor e buki ta conta e storia completo, di e 25 añanan di e Status Aparte di Aruba te cu creacion di Caribe Hulandes. E buki aki ta forma parti di e Maletin di Tesoro cu lo parti na e scolnan durante luna di februari proximo, den cuadro di e celebracion di 25 año di nos Status Aparte.

Uzando imagen di bandera di Antia y di Aruba, pinta pa Sidney Gunsam, a splica na manera simpel y ludico, cu prome Aruba tabata parti di Antia Hulandes y cierto momento no mas. Aruba a haya su Status Aparte. Bon mira un topico hopi abstracto, pero mester bisa cu e buki a haya su acogida cerca nos muchanan. Cada mucha ta capta loke e ta capaz di capta.

Ayera Evelyn Ruiz-Croes a pre-

senta e buki nobo, e version adapta na na Minister Mr. Drs. Arthur Dowers, e edicion nobo cu a haya e titulo: “Epa! ...un strea y mas strea”.

A logra realisa e buki aki, cu kaft duro e biaha aki, cu sosten di Charuba, specialmente di Des Croes y Alice van Romondt, man artistico di Sidney y di Sheila, ayudo di Unoca y sin lubida conseho y feedback di diferente hende.

Durante e presentacion den sala di prensa di Conseho di Minis-

ter, a gradici Minister Mr. Drs. Arthur Dowers pa su aporte pa e buki aki por dreña e klasnan na Aruba. “Ta nos speranza cu cada mucha por yega na haya e buki aki un rato den su man pa disfruta y siña di dje. Ta pa nan e ta”, asina e autor a bisa den forma orguyoso na final di su discurso.

Riba e fotonan adhunto por aprecia momento cu a presenta e buki nobo na Minister di Enseñansa, den presencia di Sra. Alice van Romondt como Presidente di e Comision Celebracion 25 año di nos Status Aparte.

